

Sumiiffiit ilaanni aalakoornartunik nioqquteqarnissap sassaalliisarnissallu inerteqqutaanissaanik oqallisissiatut siunnersuut

(Medlem af Inatsisartut, Knud Mathiassen, Løsgænger)

Akissuteqaat

(Peqqissutsimut Naalakkersuisoq)

Naalakkersuisut sinnerlugit Inatsisartuni ilaasortaq Knud Mathiassen, Attaviitsoq, qutsavigerusuppara, sumiiffiit ilaanni imigassap aalakoornartup nioqqutaallunilu sassaalliissutigisarnissaanut inerteqqutip oqallisigineqarnissaanik siunnersuuteqarneranut.

Aalakoornartup sakkortuup nioqqutaasinnaanera peqqinnissamut isumaginninnermullu atatillugu unammillernartoqarnera nassuerutigissallugu pingaaruteqarpoq. Aalakoornatumik pinngitsuuisinnaajunnaarneq inummot namminermut, ilaquutaasunut inuiaqatigiinnullu ataatsimut isigalugit ilungersunartunik sunniuteqartarpoq.

Oqaluttuarisaaneq eqqarsaatigalugu nunatsinni sumiiffiit ilaanni aalakoornartut sakkortuut killilersuiffigineqalernikuupput nuanniitsunik pisoqartarnera kiisalu aalakoornartup sakkortuup innuttaasut ilaannit annertuumik atornerqartarnerata kinguneranik. Ajornartorsiutit tamakkua suli ullumikkut eqqaamanissaat naleqquppoq, inuiaqatigiillu akornanni atugarissaarnissaq, minnerunngitsumillu meeqqat atugarissaarnissaat illersorniarlugu suli eqqarsaatigineqarnissaat pingaaruteqarluni.

Isumaginninnikkut ajornartorsiutit imigassamut aalakoornartumut attuumassutillit assigiinngiaarput, nunalu tamakkerlugu assigiigatik. Inoqarfiit ilaanni aalakoornartumik annikinnerusumik atuisoqarpoq tamakkualu isumaginninnikkut ikinnerusunik ajornartorsiuteqarfiullutik, sumiiffinnili allani aalakoornartut annertunerusumik atornerqarput tamakkualu aalakoornartumik atuinerup kinguneranik soorlu aalakoornartumik pinngitsuuisinnaajunnaarnermik, pinerluttuliornernik, angerlarsimaffinni perulluliornernik kiisalu peqqissutsikkut ajornartorsiutinik unammilligassaqaarfiunerullutik.

Naalakkersuisut isumaqarput, pissutsinut immikkuullarissunut unammilligassanullu naleqqussaallutik kommunalbestyrelsit aalajangiinissaminnut periarfissaqartuassasut. Imigassamik aalakoornartumik sakkortuumik nioqquteqarnissamut inerteqqutit maanna atuuttut, inatsisitigut aqquutissiuussinissamik kommunalbestyrelsit saaffiginninnerat tunggavigalugu, Naalakkersuisut suliniuteqarnikuupput.

Naak inuup nammineq aalakoornartutussanerluni aalajangiisarnera apeqqutaanerpaasaraluartoq, inerteqquteqarunnaarnikkut aalakoornartumik pinngitsuuisinnaajunnaartartut amerlanerulersinnaapput. Taamaammat Naalakkersuisut isumaqarput, nunatsinni sumiiffiit ilaanni killilersuinerit atuutsinneqaannarnissaat akisussaaffilimmik iliornerussasoq, eqimattakkaat sanngiinnerit inuiaqatigiillu ataatsimut illersorsinnaaniarlugit.

Naalakkersuisut isumaqatigiissutigaat, inoqarfinni avinngarusimanerusuni inuuniarnikkut atugassat ilungersunarsinnaasartut, tamakkualu pitsangorsaaviginissaat pisariaqartoq. Tamatumunnga aaqqiissutissatut aalakoornartumik sakkortuumik inerteqquteqarunnaarneq isigineqartariaqanngilaq. Tamatumunnga taarsiullugu najugaqarfiit, ilinniarnissamut periarfissat, suliffissaqarneq peqqissuserlu pitsangorsaaviginiarlugit, isumaginninnikkut ajornartorsiutit pissutaasut iliuuseqarfigisariaqarput.

Nuna tamakkerlugu aalakoornartumik sakkortuumik nioqquteqarsinnaaneq ammaanneqaralarpat, peqqissutsikkut isumaginnikkullu sunniuteqaatissai sumiiffimmilu pisariaqartinneqartut kissaatigineqartullu eqqarsaatigilluaqqaartariaqarput. Assigiaartumik nioqqutissanik pilersuineq inuiaqatigiillu illersornissaat oqimaaqatigiissinniarneqartariaqarput, minnerunngitsumik meeqqat peqqinnissaat atugarissaarnissaallu eqqarsaatigalugit.

Oqallilluarnissassinnut kissaappassi